



Via San Secondo 7 bis - 10128 Turin (Piemont)
Tel. 011/5660491 fax: 011/5920282 - giovpiem@yahoo.it
www.gioventurapiemontèisa.net

Prospetive 'd promossion për la lenga piemontèisa

L'ancontr ëd dumìnica - organisà da Gioventura Piemontèisa ansema la Region Piemont - an sle prospetive legislative 'd tùa e promossion dla lenga piemontèisa a l'ha dàit gnun-e respòste. J'Associassion e 'l mond politich për ël moment a l'han nen trovà na manera 'd capisse. Tavo Burat e Giampaolo Sabbatini, relator dël Convegn moderà da Mario Chiapetto, a l'han ësbojà le rason ëd l'oposission dël mond cultural piemontèis a j'antèrvent politich pitòst dësdeuit ëd costi ani. Antra 'd

coste, l'arfud ëd prinsipi dle decision calà da l'òut e amponùe a livel sentral, e l'auguri che la competenza a passa ai rapresentant dël teritòri, visadì le Region; peui la gròssa malintèisa ch'a veul, për riverensa e sogession al mond académich italian (ij "cacam"), la lenga piemontèisa catalogà ant ël nùmer dij parlé galitàlich, arpossandne ij caràter tipich galromanz. Da l'àutra banda ël vicepressident dël Consej regional Roberto Placido, ùnich rapresentant politich ch'a l'é presentasse (comben che tuit ij consijé regionaj e ij parlamentar

elegiù an Piemont a fusso stàit anvità), anreisà ancreus an s'na posission sarà al diàlogh e ch'a-j nega a la lenga piemontèisa l'arconossiment ëd soa realtà 'd minoransa nassional e 'd lenga regional. Present an sala 'd rapresentant ëd le minoranse ossitan-e, franch-provensaj, franch-provensaj ëd le Pulie, arbëreshë, tuit avzin e solidaj con la càusa dla lenga piemontèisa.

Na gran confusion antra minoranse teritoriaj e nenteritoriaj, antra le prospetive possìbij ëd seurte dal "canton" e la frustrassion ëd vèdde 'l piemontèis tratà semp ëd pì da babacio n'ani dòp l'òutr: escludù da la protession dla Lej an sle minoranse linguìstiche stòriche, negà ant soa esistensa dal mond académich italian, campà fòra da

l'arconossiment dl'Èstatut regional, minimisà e butà ant ël canton da la ministrassion dla legislassion regional, obligà a canté martin-a tute le vire për garantisse ancor n'ani d'esistensa ativa, stèrmà an tute j'ocasion ufissiaj com a së stèrma la cracia sot al tapiss. Un diàlogh antra 'd ciòrgn, dle vire anvisch e dzora dle ligne, ma che tutun a peul arvellesse a la finitiva ël prim pass ëd na prospetiva d'assion neuva. Arpossé tut sùbit tuta strumentalisassion e tuta spartission partìtica, senza tutun fé visa che la politica a-i sia nen: la lenga piemontèisa a l'é dij Piemontèis an tan che bin cultural e marca d'identità, e dcò, parèj ëd tute le lenghe e 'd tute le colture, dl'umanità tuta. Ij Piemontèis a dèvo arpijessse la competenza 'd costa richèssa che la stòria a l'ha lassaje e dèfendla da l'indiferensa dla polìtica. As deurb la stra a l'organisassion për la presentassion ëd na serie 'd propòste 'd Lej d'inissiativa popolar e al sostegn ëd na consiensa ch'a monta da tute le provinse.

